

辰谿縣志

辰谿縣志

辰谿縣志卷之二十七

署知縣事南寧唐宇譔鼎銘輯

人物志

附隱逸

人才難知人尤難不知人而論人抑又難矣雖然
人品斷以行實公道徵諸輿論則夫德行文章經
濟事業照人耳目固翹然而傑出卽令匹夫慕義
一善足述亦情殷世教者所必棄瑕錄瑜藉以矜
俗式化斯則善善欲長之微意也作人物志

宦業

明

李景誠中永樂戊子鄉榜官延平府同知蒞任數載惟以安民爲重嘗平賊有功延民賴之解組後琴書自娛潔已範俗里黨奉爲矜式祀鄉賢

通志

府志 縣志

唐 原家貧力學篤信尙義永樂初以太學生高
等拜監察御史彈劾無私憲度聿振

通志

府志

縣志

唐 璉性質直無僞永樂中以太學生授戶部主

事陞刑部郎中處事明敏案無畱牘傑然稱治劇

才通志 府志縣志

唐 瑜中永樂丁酉鄉榜授江西龍南知縣愛民

息訟勤於政治尤加意作興人材時縣自洪武末

裁併學校以生員隸毬庠黌舍遂廢瑜疏請復之

由是文教復振續通志 江西通志

余顯宗以歲貢授廣西興化令改福建邵武令歷

三任皆善守官箴退休後益恬靜自甘祀鄉賢府志

又續通志據廣西通志載余顯宗洪武中以太學

生知興業縣歲饑請發倉賑貸多所全活永樂初
調知陸川流亡悉招復業擢戶部主事

鍾以辰以歲貢任廉州府推官潔已奉公會廉有
賊警以辰濟河擒之闔境安堵祀名宦

府志 縣志

志

余永鸞以歲貢授巴縣令清介自矢不取民間一
物有餽遺者悉却之僅受一瓜其妻恚而棄之鸞
戲曰人謂吾清不知汝乃過吾歷三年以不善事
上官免歸檢囊僅得金三兩力耕授徒以老祀鄉

賢一統志 通志 府志 縣志

劉仲顏字汝學號天池少孤母張氏教之成立弱冠淹貫經史以嘉靖丙申選貢令蘇州吳縣五載興利除害惠溥於民吳人德之家居厚恤宗親有妹早寡子幼仲顏爲建室置產使母子得所石馬溪有橋久圯仲顏捐資重建題曰長慶

府志

米萬鐘字辨我簡重恬默爲學務自得理解萬歷甲午舉於鄉任靖州學正陞甕安令不詭法不寃民土酋奪人田地相仇殺院司符下勾攝牽引至

千餘人萬鐘止論首從數人餘悉原之遷守彌勒
州疏寃剔濫比戶歌詠改靖江王府長史旋以老
乞歸 三楚文獻錄 通志 府志

余子翼字應宿號荆楚髫年卽苦志力學中萬歷
乙卯鄉試戊午分校滇闈己未成進士授長興知
縣邑俗數黠子翼矯以寬厚民皆化之改遷鄆城
令時蓮妖陷鄆士民各鳥獸散子翼集鄉勇擊之
斬首百餘獲渠魁唐明等二十餘人賊遂平卒祀

鄉賢

通志

府志

縣志

米助國字民和號順齋九歲通經能文中天啓甲子鄉試乙丑進士授江西龍泉知縣有兄弟爭產者助國愷切訓諭動以天良兄弟皆愧悔涕泣而服調南昌政繁賦重案牘累積助國齋心理之平反大辟五六人黔配十餘人釋累年之囚數十人時嬖璫弄權省直取容胥媚以祠撫按檄若葉下助國堅執不從未幾忠賢敗朝廷徵立祠罪南昌獨無擢福建道監察御史出尙書畢自嚴給事章正宸獄巡宣大時究民利病及邊防守禦七疏上

之越七日寇至復立草乞援三疏師未至而寇已掠野去因下部議先時上卜王應熊相正宸持不可下獄助國抗疏論其冤獲解至是應熊忌而執之遂奪職及正宸典試楚闈聞助國寓鄂三謁三謝之家居十餘載扶衰救弊里中賴焉壽六十

七終子八次肇頤字觀甫崇禎間以歲貢歷官銅

仁知府值流寇攻城城中兵不滿千賊兵數萬肇頤奮擊之身先士卒斬獲無算以功進安順道旋

掛冠歸吟詠終老

南昌縣志

通志

府志

余鵬翔字誕北年十六中天啓甲子鄉試乙丑成進士任金溪知縣嫻吏治舉措不動聲色先是滑吏朋黨爲奸侵官帑無算鮮衣怒馬遊冶稱豪鵬翔按治之羣吏畏伏縣舊多盜令不能詰許濟爲商賈舟車所聚大盜窩於河西地界臨川踪跡尤密鵬翔出秘計直抵盜室捕獲之賊風屏息藩司有通吏金溪人也職納課諸令畏之鵬翔不爲禮他日謁藩司吏故據坐睥睨會吏有弟給事縣庫以盜帑事覺鵬翔按其罪連通吏請論如法自是

諸吏益自戢辛未調遂安壬申擢主事轉員外已
卯任徽寧道庚辰轉七省糧儲道遷司農國祚失
崎嶇滇黔不屈而死

金谿縣志

通志

府志

皇清

楊捷字最聞康熙丁酉舉人揀選知縣借補山
東西繇鹽大使清釐鹽政革除積弊商民便之公
餘與生童講習諄諄以敦俗爲念先是山東屢飢
灶戶多流亡遼東積欠鹽賦未完捷奉檄催徵察
其仳離情形捐廉墊解議緩徵以償未幾辭疾將

歸有未償者悉給串捐免以杜後官追比之弊
任時篋中惟圖書數卷西繇士民感泣載道年六
十二卒邑進士唐效堯輓以詩云作吏一囊蓬島
月歸家兩袖洞庭風其廉介有如此者

庠生楊超發採

劉文確字堅泰號果堂乾隆癸酉拔貢考授正白
旗官學教習揀發山東補利津知縣勤於撫字築
隄防疏溝洫捕蝗蝻賑災傷民食其德適海水溢
良田變斥鹵民患苦之確爲詳請豁免大糧地一
百二頃有奇聽斷庶獄片言折之苞苴不行又捐

俸修文昌閣建義學延師訓課士風一變以丁艱
歸津邑士民立去思碑以誌德政焉

利津志

劉元鰲字飛漢號連六賦性沉毅立品端方少體
親心刻苦讀書中乾隆己卯舉人挑發廣西以知
縣用甫授官卽告其父書云男以冰潔自矢總拚
咬斷菜根不改窮酸本色又云自古稱循吏者不
盡在大位要無負讀書初志歷署鬱林州州判及
興安永淳東蘭羅城各州縣事辛卯題補藤縣知
縣每到任卽畱心訪求地方利病興除一切其於

民間詞訟事無大小必悉心研鞫準情酌理斷之
嘗云王道本乎人情括盡一部律例大旨刑名家
徒泥成法瞻顧處分宜其動多格礙以此歷官數
任從無畱牘亦無不允協之案在興安時適唐家
司遇水災鰲捐廉數百金如例賑之藤有二富室
因地界構訟書役視爲奇貨鰲據理速爲斷結令
若輩無所施其伎倆其不直者以金賂親近冀爲
調停某謝曰主人凜凜不敢以私干又某甲圖財
害命扛屍將匿遇某乙許分以金囑勿洩後案發

甲反誣乙兩以刑訊乙竟誣服鰲察兩人情形甲
狡而悍乙質而畏刑知非信讞乃更密訪得甲素
貧而遽獲金狀併嚴訊其妻子吐實甲乃伏罪又
興安離城十里之村店有客失金報竊鰲細詢被
竊情形卽行往勘僕從多不及備比至細勘之喝
曰此非外賊贓亦未遠去索室搜之必獲未幾於
店之酒窠下驗其土鬆掘之則所失金併包裹在
焉卽令事主認領而置店家於法其居官以清慎
勤自勵類如此上官稔其賢能正擬保題無何以

勤勞致疾卒於官時年三十九歲士民皆惋惜焉
及歸葬鄉諡端毅子家傳繼登賢書仕滇南孫曾

亦克紹書香

舉人劉榮批採

儒林

皇清

鍾其瑞歲貢生官平江訓導持已嚴正士林仰爲
模範後十年胞弟鼎亦任平江先後媿美人以爲

難兄難弟云

增生鍾與仕採

麻昌時字際可歲貢生性寬厚家居時路遇惡少